



BASE DE FRANÇAIS MÉDIÉVAL

Désiré

Texte établi par Prudence Mary O'Hara Tobin
Genève, Droz, 1976

- Transcription électronique :** Base de français médiéval, <http://txm.bfm-corpus.org>
- Sous la responsabilité de :** Céline Guillot-Barbance, Alexei Lavrentiev et Serge Heiden
[bfm\[at\]ens-lyon.fr](mailto:bfm[at]ens-lyon.fr)
- Identifiant du texte :** `desire`
- Comment citer ce texte :** *Desiré*, édité par Prudence Mary O'Hara Tobin, Genève, Droz, 1976.
Publié en ligne par l'ENS de Lyon dans la Base de français médiéval,
dernière révision le 20-6-2016,
<http://catalog.bfm-corpus.org/desire>

Licence :



LICENCE OUVERTE
OPEN LICENCE

: Texte et suppléments numériques



[169]

LE LAI DE DESIRÉ

Entente i mettrai e ma cure
a recunter un aventure
dunt cil qui a cel tens vesquirent
par remembrancë un lai firent.
5 Ço est li lais del Dessiré
ki tant par fu de grant beuté.
En Escoce a une cuntree
ki Calatir est apellee,
encoste de la Blanche Lande
10 juste la mer ki tant est grande.
Iluec est la neire chapele
dunt l'en cunte, ki mut est bele.
Un vavasur i out jadis,
mut fu preisez en sun païs ;
15 tant de terre cum il aveit
del rei d'Eschoce en chef teneit.
Feme aveit solunc sun parage,
assez l'amot, kë ele ert sage.
De ce lur est mesavenu
20 k'ensemble n'unt enfant eü ;
a merveilles en sunt dolent
e a Deu priënt mut sovent,
par sa pité les confortast
ke fiz ou file lur donast.
25 Une nuit jurent en lur lit,
la damë a sun seignur dit :
« Sire, je ai oï parler
k'en Provence, dela la mer,
ad un cors seint mut gloriüs ;
30 dames i vunt od lur espus ;
nul nel requert pur tel bosoing,
quel quë il seit ou pres ou loing,
ke sa requeste ne li face ;
de Deu en ad ottrei e grace
35 nomeement d'aver enfant.
Jo ai al quer pesance grant.
Sire, ke nus apareilums,
passum la mer e s'i alums. »
Li sire li ad ben otrié,
40 pus unt lur eire aparellé.
Sanz demorance passent la mer,
a saint Gile vunt pur orer.
Un ymage tote d'argent,
sis marz i out, men essient,
45 sur un alter le presenterent,

[170]

[171]



fiz ou file lui demanderent.
Quant fait aveient lur preiere,
en lur païs s'en wunt arere.
La dame est d'un fiz enseintee
50 ainz qu'a mesun seit repeiree.
Li sire en est joius e lez,
il ne fud unkes si haitez,
ja si fud tut sun parentez.
Al terme qui lur fiz fud nez
55 apeler le funt Desiré,
pur ço que tant unt demoré
kë il enfant n'urent eü,
ore ad seint Gile fet vertu.
Lur fiz nurirent e garderent
60 cum celui que il mut amerent ;
beus fu de cors e de visage.
Quant il est venuz en eage
ki d'eus li poeient departir,
s'il l'enveient le rei servir.
65 De bois e de rivere aprist
e volunters s'en entremist.
Li reis l'ama e tint mut cher,
pus l'adoba a chevaler.
Quant chevaler fu Desirez,
70 hastivement est mer passez ;
en Normendie conversa
e en Bretagne turneia.
Des Franceis fu mut alosez
e de tuz autres gens amez ;
75 dunc ert chevalerie en pris.
S'uns chevaler d'autre païs
alast ailurs pur sun pris quere,
ou a turnement ou a guere,
n'ert mie en travers feruz,
80 ne de ses compaignuns vendus.
Dis anz i esteit Desirez
k'il n'est arere returnez.
Mut le fit ben, mut s'avança,
deci que li reis li manda.
85 En sa cuntree en est venuz,
mut fu del rei ben receüz,
mut le tint cher pur sa valor
e mut li porta grant honor.
Pruz fu e de mut grant beuté,
90 tote gent loënt Desiré.
Unques nel pot del rei partir,
fors sulement a Calatir ;
par le mandement de sun pere
esteit alez veer sa mere.

[172]



- 95 Ce fu en l'entree d'esté ;
al quart jor qu'il out sojorné,
par un matin s'esteit levez,
ben s'est vestuz e aturnez,
chausez s'esteit mut richement
- [173] 100 cumë a chevaler apent,
braiz, chemise ot de chensil
plus blans que n'est flur en avril ;
d'un mantel vert ert afublez,
ses esporuns ad demandez,
105 sun bon cheval fet demander,
pur sei deduire volt munter.
Li cheval fu e beus e grantz,
mut par fud genz e avenanz
de cors, de vis e de facun ;
110 n'out en lui nule mesprisiun.
Il est munté sur sun destrer
mut out en lui bon chevaler ;
beles gambes ot e beus pez.
Sur ses estruiz s'est apuiez,
115 des esperuns point le cheval
tote la vile contreval ;
sanz compaignun s'en est issus,
vers la Blanche Lande venuz.
Les arbres veit beus e floriz,
120 e des oiseus oït les criz.
Li sanc li remut e tressaut,
li corages li munte en haut,
grant delit ad d'oïr le chant ;
en la forest se met avant.
- [174] 125 Dedenz la lande enz el boscage
ot un seinz hom sun hermitage ;
Desiré le soleit veer
e de sun fruit sovent aver
en s'unfance quant il chaçout
130 e od sun pere trespasout.
Purpensez s'est qu'il i irra
si le trove, sil parlera.
Quant il erra vers la chapele,
garda, si vit une peucele
135 vestue d'une purpre bise
e d'une mut bele chemise.
La colur ot blanche e rovente,
e de cors fu ben faite e gente ;
sanz guimple esteit echevelee
140 e nu pez feu pur la rosee.
A une funteine veneit
ke suz un grant arbre surdeit ;
dous bacins d'or tint en ses meins.



- Li chevalers n'ert pas vileins ;
145 a pié desent, si l'a saisie,
il en vodra fere s'amie ;
sur la freche herbe l'ad cochee,
jo quid qu'il l'eüst asprisvee
quant ele li cria merci :
150 « Chevalers, tollez vus de ci ;
ne serrez gairez avancez
si de mun cors me honitez.
[175] N'i faites nule mesprisiun,
laissez m'estre pur gueredon.
155 Jo sui od une damaisele,
el secle n'at nule si bele.
Jo la vus ferai ja veer ;
si vus estes de tel poer
gardez qu'el ne vus eschap mie
160 pur nule ren k'ele vus die.
Si de li estes ben amez,
pur neent seriez esgarrez ;
assez avrez or e argent
tut a vostre comandement.
165 Ne quidez pas que jo vus mente,
e si ce ne vus atalente,
a mei ne poez vus faillir ;
jo ferai tut vostre pleisir.
Tut aseür seiez de mei ;
170 jo vus afi la meie fei,
aiderai vus a grant bosoing,
ou seit de pres ou seit de loing. »
Quant Desirez l'oï parler,
si la leissa atant ester.
175 La meschine l'ameine dreit
la ou sa damaisele esteit ;
ço fu dedenz une foillee.
Sur un bon lit s'ert apuiee ;
la coilte fu a eschekers
[176] de deus pailles ben faiz e chers,
e tut pareit la flur novele.
Devant li sist une pucele.
Cele qui Desiré mena
de loinz s'estut, si l'apella :
185 « Vassal, fet el, regardez ça ;
dedenz cele foillee la
pernez ço ke jo vus pramis.
Veïstes vus unk si bel vis,
si beles meins, ne si beus braz,
190 ne si gent cors vestu a laz,
plus beus chevoils ne plus dulgez
plus assemez ne meuz treciez ?



Unques ne fu si bele nee.
Ben me sui vers vus aquitee ;
195 alez avant, ne dotez ren,
mut ad en vus proesce e ben. »
Desiré l'oi, cele part vet,
sun bon cheval estraier lait.
Quant la pucele l'ad veü,
200 n'i a neent plus atendu ;
fors de la foillee s'en ist
en l'esperce del bois se mist.
Desirez s'est alé après,
[177] veüe l'ad e sui adés ;
205 mut fu igneus, pas ne se feint,
assez hastivement l'ateint ;
par la mein destre la saisi,
avenantment parole a li ;
« Bele, fait il, parlez a mei,
210 pur quei fuiez a tel deffrei ?
Chevaler sui de cest païs,
vostre hom serrai e vostre amis ;
pur vostre druerie aver
vus servirai a men poeer. »
215 La pucele l'en mercia,
parfundement li enclina
e dit ke pas nel refusout,
ne sun offre ne dejetout.
Otrree est la druerie ;
220 il fait de li cum de s'amie.
Une grant pece fu od li,
mut a envis s'en departi.
Mes el li ad doné cungé,
si li ad dit e enseigné
225 ou il pora od li parler
e cum il la pora trover.
« Ami, fet ele, Desirez,
al Calatir vus en irez ;
un anel d'or vus bailleraï,
230 e une chose vus dirai :
or vus gardez de meserrer,
si vus penez de ben amer ;
[178] si vus mesfetes de neent
l'anel perdrez hastivement
235 e si ço vus seit avenu
ke vus aiez l'anel perdu,
a tuz jorz mes m'avez perdue
sanz recovrer e sanz veüe.
Gardez ke mut le facez ben,
240 ne vus targez pur mei de ren.
Ainz ke vus eüssez m'amur



futes vus de mut grant valur.
N'est mie dreiz a chevaler
ke pur amur deive enpeirer. »
245 L'anel li ad mis en sun dei
e il la beise e trait vers sei ;
pus est sur sun cheval muntez,
a sun ostel en est alez.
Mut despendi e mut erra,
250 de nule ren ne se targa ;
plus dona il en un sul meis
k'en demi an ne fit li reis.
En la contree repeirout,
pur s'amie kë il amot ;
255 ensemble parolent sovent,
tant s'entreamerent lungement
kë un fiz e un file en out ;
el ne li dit ne il nel sout.
Une feiz l'ot li rei mandee
260 fors del país l'aveit menee
ensemble od lui od grant bosoing,
por osteier merveilles loing.
Quant il esteit en repeiré
Desiré prent del roi congé ;
265 en sa terrë en est alez
a Calatir, ou il fu nez.
La nuit qu'il vint, i sojorna,
e al demain matin leva ;
i est muntez sur sun destrer,
270 si s'est alez esbaneier
vers la Blanche Lande tut dreit
ou s'amie trover soleit.
Tut sul, eissi cum jo vus di,
sur l'ermitage s'enbati
275 ou li seinz hermite maneit
ke li chevalers connisseit.
D'une chose se purpensa,
k'a cel seint home parlera,
si se fera a lui confés ;
280 ne set quant il i vendra mes.
La porte ovri, dedenz entra,
en la chapele le trova.
« Sire, fet il, si sui venuz,
confés voil estre e absolus. »
285 Li hermites lui ottreia,
e il s'asist, si li clina ;
ses pecchez li ad discovers
dunt il esteit seür e serz.
De s'amie li regeï,
290 cumë il vint primes a li.

[179]

[180]



Li hermites li conseilla,
sa penitence li chargea.
Quant fut asoluz e seinez,
a sun cheval est repeirez,
295 par l'estru munte e tent le frein,
ses deiz esgarde e pus sa mein ;
n'aveit mie de sun anel,
sachez que pas ne li fu bel.
Ben s'aparceit qu'il ot perdu,
300 unkes mes si dolent ne fu.
D'eluec s'en part, plus n'i esteit ;
hastivement cele part vait
ou s'amie quidout trover,
kë il vodreit a li parler.
305 Trestut le jor i demora
qu'il ne la vit, n'a lui parla.
Quant il ne pot parler a li,
mut par se tint a malbailli.
« Bele amie, fet Desirez,
310 ou estez vus ? Quant me verrez ?
Estez vus corucee a mei ?
Morir m'estut si ne vus vei.
Vostre anelet m'avez tollu,
ben sai que par vus l'ai perdu ;
315 ja mes n'avrai joie ne heit,
alas ! chetif ! kë ai mesfet ?
Ja vus eim jo sur tote ren ;
certes, ne fetes mie ben.
Li hermites me confessa,
320 unques de vus mal n'i parla,
de mes pecchez requis pardon ;
si jo ai fet ultre raisun,
bele, ne vus en corucez,
ma penitence m'enchargez.
325 Ço ke li hermites me dit
e les enjuines qu'il m'aprit :
a vostre pleisir les lerrai
e vos comandemenz ferai. »
Ne li sout tant merci crier
330 k'ele vousist a li parler ;
mut est dolent en sun corage,
durement maldit l'ermitage
e l'ermite qu'il i trova
e la buche dunt il parla,
335 tuz ceus ke consenti li unt,
ne ki jamés i parlerunt.
Quant veit que ne li ad mester,
arere l'estut repeirer ;
a Calatir s'en vait arere.

[181]

[182]



[183]

340 Mut est dolenz de grant manere,
del dul qu'il ad s'en pesanti,
en poi de tens en maladi ;
sa grant joie met en tristur,
e sis chanz est turnez a plur.
345 Un an enter e plus languï,
trestuz le tenent a peri.
Tuz diseient qu'il se moreit,
e il meïmes le diseit.
Al chef de l'an qu'il out jeü,
350 oiez cum il est avenu :
un jor le leisserent dormant
si esquier e si sergant ;
tuz sunt alé esbaneier,
ke ne l'osouent esveiller.
355 Quant il aveit assez dormi,
esveilla sei e esperi.
D'une chose s'esmerveilla :
ke suls esteit ; mut li pesa.
Si cum il ert en tel ennui,
360 s'amie vint parler a lui.
Il la conuit e esgarda ;
de la joie que il en a
sur sun cute s'apuie al lit.
Ele l'apele, si li dit :
365 « Desirez, tu ies malbailliz,
tut afolez e tut periz.
Purquei morez tut a essient ?
Efforce tei ; ne vaut neent.
Si jo t'ai lungement haï,
370 certes, tu l'ad ben deservi ;
tu te fesis de mei confés,
si ne recoveras ja mes.
Esteiez tu de mei chargez ?
Ço ne fu pas si grant pecchez ;
375 jo ne fu unques espusee,
ne fiancee ne juree,
ne tu femme espusee n'as,
unques nule n'en afias.
Quant tu confessiun quereies
380 ben sai ke de mei partireies.
Ke valt li pecchez a geïr
deci ke hom le voille guerpïr ?
Soventes fez as tu doté
ke jo t'eüsse enfantesmé ;
[184]
385 n'aies tu ja de ce regard,
ne sui mie de male part.
Quant vus irrez desk'a muster
la messe oïr e Deu preier,



delé vus me verrez ester
390 e le pain beneit user.
Mut avez vers mei meserré ;
pur ço ki tant vus ai amé
vus voil faire tant de retur :
veer me porrez chascun jor,
395 ensemble od mei rire e juer.
Laissez vostre dolur ester,
mes ja certes plus n'i avrez,
ne confessiun n'en querrez. »
Li chevalers li respundi :
400 « Bele amie, vostre merci.
De tant cum vus me confortez,
sui jo garriz e trespassez.
Unques de ren n'oi si grant hait. »
Il la beisë ; atant s'en vait,
405 e il remeint joius e lez ;
tut est gariz, tost est haitez,
pur la joie que il atent
est trespasé de grant turment.
Quant il vait al muster orer,
410 s'amie vait lez lui ester
e le pain beneit manger
e la croiz fere e lui seigner ;
a li parole asez sovent.
Trespasé est, nul mal ne sent,
415 eire e despent si cum il fit
ainz que s'amie le haïst.
Li rais l'aime par grant amur,
ne part de lui ne nuit ne jor.
Une feze alerent chacer,
420 en la forest esbaneier,
arcs e seetes funt porter,
as aceintes volent berser.
Entre le rei e Désiré
lez un grant fust sunt aresté,
425 a un grant serf anbedui traient ;
il ne l'oscient ne ne plaient.
Lur setes pres dë eus chaïrent
desur l'erbe, si qu'il les virent.
Mut se teneient a escharni
430 de ço qu'il aveient failli ;
lur arcs gettent e funt destendre ;
lur seetes voleient prendre
la ou il les virent chair ;
ne purent trover ne veïr.
435 « Deu ! dit li reis a Désiré,
nus sumes tut enfantesmé.
Nos seetes chaïrent ci

[185]



- [186]
- 440 devant mes oilz, si que je cui.
Or n'en poüms nule trover ;
grant merveille nus deit sembler. »
Quant il alouent si parlant,
devant els virent un enfant ;
genz ert e grant e ben creüz,
d'une cote ert estreit vestuz
445 d'escarlette tote vermeile ;
si fu beus e granz a merveille.
Li chef ad bel recercellé,
le vis treitiz e coluré ;
les seetes tint en ses meins,
450 de parler ne fu pas vilains.
Tut premerain le rei salue ;
sa seete li ad rendue,
a Desiré la sue rent,
a lui parla mut bonement.
455 « Sire, fet il, tu ies mes pere,
ici m'a enveié ma mere ;
ensemble od vus volt ke jo seie,
ke mes parenz conuise e veie.
Quant tu primes a li parlas
460 en la lande ou tu m'engendras,
un anelet d'or te dona,
pus le perdis : mut te pesa.
Ici l'ai aporté od mei ;
metez le, sire, en vostre dei. »
465 Desirez conut ben l'anel,
il ad saisis le damaisel,
entre ses braz l'estreint e prent,
cil ad beisé cent fez e cent
les oilz, le vis e le mentun.
[187]
470 Li reis e tut si cumpaignun
li beiserent demeintenant ;
al vailet funt mut bel semblant.
Al rei reconeut Desirez
ou li vallet fu engendrez.
475 Ensemblë od els l'unt mené,
mut li tenent en grant cherté.
Desirez l'aime e tent si cher,
ne pot ne nuit ne jor leisser.
Quant ot dous meis od li esté
480 e coneü sun parenté,
un jor fu par matin levez,
si s'ert vestuz e aturnez,
sor sun chaceür est muntez ;
devant sun pere esteit alez
485 si cum il veneit del muster,
munter voleit sur un destrer.



- « Sire, fet il, entent a mei.
Je veng prendre congé a tei ;
a ma dame m'estut aler
490 jo ne pus mes ci demurer.
– Avoi ! beu fiz, fet Desirez,
pur les seinz Deu ne me ociez !
Certes, meuz vodreie morir
ke vus veie de mei partir.
495 – Sire, fait il, faire l'estut. »
Li cheval point e il se muet,
tuz de galops de li s'en part.
Desirez munte, ki est tart
k'il ait sun fiz aparceü
[188] 500 kë il le crent aver perdu.
Sovent l'apele par sun nun,
après li vait a esperun,
s'il li prie k'il s'arestast
e k'un petit a li parlast.
505 Mes cil ne l'en ad pas creü,
tant ad sun dreit chemin tenu
qu'il est en la forest entrez.
Tote jor le suit Desirez ;
quant ço vint a l'anutement,
510 li vallez eire durement
e Desiré mut se hasta,
tant que ses bons chevaux s'esta,
a un grant arbre c'est hurtez,
arere chet tut reversez.
515 A pé se met, sun cheval meine,
cel jor ot il travail e peine.
Sun fiz deperdi Desirez,
ne set quel part il est turnez.
N'a gueres par le bois alé,
520 un poi sur destre ad esgardé,
suz un cheine lez e foilu,
un feu ad choisi e veü.
Savez quei Desirez quida
quant il le feu vit e trova ?
[189] 525 Ki alques riche hom i geüst,
kë el demain chaser deüst
e le jor i eüst chacié,
mes illuec li fut anutié.
A la clarté del feu qu'il veit,
530 cele part vait a grant espleit.
Un neim i trove sulement,
vestu de paille estreitement ;
peivre soudout en un morter,
hastez quisseit sur le bracer
535 d'un sengler parcreü e grant.



Desirez est venu avant,
le neim salue ducement,
mes il ne li respunt neent.
Il leist le peivre e li mortar,
540 si curut prendre le destrer ;
a une part l'aveit mené,
pus si li ad le frein osté
e la sele li eslacha,
de la freche herbe li dona.
545 Al chevaler revet arere ;
d'herbe e de junc e de breuere
a une cuche appareillé,
un grant tapi d'ovre entaillé
[190] sur la cuche jeta e mist ;
550 le chevaler ceer i fist.
Mes il ne volt a li parler,
sa peiveré revet souder.
Quant li peivres fu ben temprez,
e li mangers tut aprestez,
555 dous bacins d'or en ses meins prent,
une toaile a son col pent.
Il ad les bacinz coneüz
si tost cume les ad veüz ;
la damaisele les porta
560 k'en la lande primes trova.
N'en volt al neim fere semblant.
Cil li mit un dobler devant
e la salere e les cutels
e pus après dous simenels.
565 En une grant coupe d'or fin
li ad li neims porté le vin,
en un esquèle d'argent
li met les hastes en present.
Li chevalers prist un cotel,
570 del lard tailla un grant morsel ;
en la peiveré le moilla,
al neim l'ofri ; il le manga.
Le hanap ad descoverclé,
del vin l'a primes enbeivré ;
575 unkes n'i manga un morsel
ne li donast autre si bel.
Li neims li vit si affeité,
si franc, si bel, si enseigné,
ne se pot mes avant celer
580 ke ne voillë a li parler.
« Sire chevalers, fait li naims,
n'estes mie fols ne vileins,
ben seiez vus ici venus.
Mes que j'en deie estre batuz,



- 585 si vus plest, a vus parlerai,
ja defence ne garderai.
Nepurquant jo sui enveiez
encuntre vus, seiez haitez,
pur vus herberger e servir ;
590 ben savium vostre venir. »
Li chevalers li respundi :
« Amis, la vostre grant merci !
ben ait ki vus i enveia,
e ki de tant me reheita ! »
595 Li neims respunt : « C'est vostre amie
ke vus aime plus ke sa vie.
– M'amie, Deus ! fet Dessirez,
dunc sui jo mut ben assemez.
– Par fei, sire, vus dites ver,
[192] 600 ke jo ferrai a mun poer
ke vus porreiz a li parler.
Si vus volez od mei aler,
pres de sa chambre vus metrai
si ke sun lit vus musteraï.
605 – Amis, ço dit li chevalers,
od vus irrai mut volonters. »
Quant del manger furent levé,
li neims ad mené Desiré
al chastel ou sa dame fu.
610 Deske a la chambre sunt venu,
n'i troverent us ne fenestre,
fors une sule al chef a destre ;
dedenz virent cirges ardanz
dunt li clartez esteit mut granz.
615 Enmi la chambre aveit dous liz
ben aturnez e ben garniz ;
dous damaiseles i giseient,
men escient k'eles dormeient.
Li neims apele Desiré,
620 si li ad tut l'estre mustré.
« Sire, fet il, esgardez ça !
C'é vostre amie ki gist la,
ceo e sa suer de l'autre part ;
entrez laënz, n'aiez regard.
625 Une meschine i troverez,
jo quid ke vus la conustrez.
A chandele cust la pucele
en un bliaud ma damaisele. »
[193] Desirez s'est appareilez,
630 par la fenestrez saut jonz pez ;
mes ne s'est mie ben tenuz,
si est devant le lit chaüz,
sur le cousté mut se bleça,



[194]

tote la chambre resona.
635 La suer s'amie s'esveilla,
grant poür ot, si s'escria ;
les chevalers ad fait lever
hastivement e els armer.
Cele ki esveillee fu
640 e le bliaud aveit cosu,
li chevaler par la mein prist,
fors l'en ameine, si li dist :
« Sire, le geredon vus rent
ke jo vus oi en covenent.
645 S'en ceste chambre esteiez pris,
mort seriez, jo vus pleviz.
Gardez, pur vostre genterise,
ke jo ne perde mun servise,
se vus ja mes un liu veez
650 ke vus rendre le me pussez,
Sire, ne me obliez mie.
– Nun frai jo, fet il, bele amie. »
Tant l'ad la pucele amené
k'il aveient le neim trové.
655 Od sa mein le feri al piz.
« Fel feint, dit elë, esbaïz !
purquei ad ço franc hom trahi ?
Alez vus ent, fuiez de ci. »
Cil s'en revunt grant aleüre,
660 a lur feu venent a dreiture.
Desirez se senti bleciez,
sur la cuche s'est apuiez,
mut par se tint a esscharni.
Quant la clarté del jor choisi,
665 la sele estraint e pus munta,
en sa contree s'en reva.
Mut fu bleciez sur le cousté
eissi ad lungement esté,
tant ke li reis dut curt tenir
670 a un chastel a Calatir.
A Pentecuste i ad somuns
tuz ses vesins e ses baruns.
Alé i sunt tut li plusur,
si cum il aiment lur seignur.
675 A la feste fu Desirez,
ki mut esteit del rei amez.
Quant del muster furent parti,
e le servise orent oï,
si cum manger deveit li reis,
680 ja ert asis sur le haut deis,
par mi la sale vint errant
sur une mule ben amblant,



- [195] une mut riche damaisele
 ensemblë od une pucele.
685 Vestues furent richement,
 lur dras valent cent marz d'argent ;
 dous blanches mules chevacherent,
 e dous blancs esprevers porterent.
 A merveile les esgarderent
690 li reis e cil ke od lui erent.
 Beles esteient sanz mesure
 de cors, de vis e de feiture.
 Od eles ot un damaisel,
 en tut le cecele n'ot si bel.
695 Devant le rei sunt aresté,
 l'einznee ad lui rei salué.
 « Sire, fet ele, atent a mei :
 jo sui venue ci a tei,
 ces dous enfanz t'ai amenez.
700 A cest vallet armes donez,
 ceste meschine conseillez
 si ke honor vus en aiez.
 Veritez est jo sui lur mere,
 e Desirez, il est lur pere.
705 Volunterz devez conseiller
 enfanz a si bon chevaler
 e a tel dame cum jo sui.
 Mut grant honor vus ai fet hui
[196] ke de ma tere sui meüe
710 e ci a vostre curt venue. »
 Li reis dît : « Bele jo l'otrei ;
 quanque vus requerez de mei
 ferei jo a tut mun poeer.
 Desendez, si venez seer,
715 demandez l'ave, e si mangez,
 ensemblë od nus deduiez. »
 Ele respunt : « Nel ferai pas,
 ma requeste primes feras.
 Mun ami me fai espuser
720 ke jo l'en voil od mei mener.
 Lealment serums assemblé,
 od mei vivra tut sun eë.
 Ja n'en quera confessiun,
 ne penitence, ne pardon. »
725 Li rei fet armes aporter,
 li damaisel volt aduber.
 Il meïmes li seint l'espee
 e si li dona l'acolee.
 De Moreis e de Lëoneis
730 aveit a la feste dous reis ;
 Cil li chauçat les esperuns



- [197] par grant honur a genuluns.
Quant adubé fu richement,
li reis, oiant tote sa gent,
735 lur dit qu'il prendrat la meschine
e si ferat de lui reïne ;
a suen oes tendrat la pucele,
kë unkes mes ne vit tant bele.
Desirez fu de l'autre part ;
740 mut durement li esteit tart
k'il eüst s'amie espusee,
e k'ele fut illuec donee.
A un muster andous menerent,
e ensemble les espuserent.
745 Quant il esteient repeiré,
la damaisele ad pris cungé ;
en sun país s'en volt aler,
n'aveit cure de sojourner.
« Muntez, fet ele, Desirez,
750 ensemblë od mei vus irrez.
Ja est vostre fiz adubez,
en ceste terre le lerrez,
e vostre fille est mariëe
mut avez fet riche jurnee.
755 Sachez de veir, il revendrunt
pur nus veer, quant il porunt. »
Desirez munte, si s'en va
od s'amie ki l'en mena.
Od li remeist en tel manere
760 ke pus ne repeira arere ;
de retourner n'ot il mes cure.
Pur remembrer cest aventure
en aveient un lai trové,
si l'apelerent Desiré.

[198]